

FORUM ONG TIMOR LESTE THE TIMOR LESTE NGO FORUM



Rua do Mercado Municipal, Dili Timor-Leste / Mobile +670 7723 5698 / forumong.tl@gmail.com / <https://fongtil.org.tl/>

KARTA ABERTA HUSI FONGTIL BA SUA SANTIDADE PAPA FRANCISCO

Dili, 4 setembru 2024

Sua Santidade Papa Francisco mak ami hadomi,

Benvindo mai Timor-Leste,

Iha biban ida ne'e, permite ami husi Forum ONG Timor-Leste (FONGTIL), organizasaun sombriña ne'ebé hamahan ONG no organizasaun baze comunidade liu 400 iha Timor laran tomak atu hato'o ami nia hanoin ruma liga ba Sua Santidade nia vizita.

Povu Timor-Leste inklui mós FONGTIL orgullu no kontente dala ida tan hetan vizita husi lider másimu Igreja Katólíka, Sua Santidade Papa Francisco. Ami espera katak, ho vizita ida ne'e hodi bele hetan dalan ne'ebé loos ba dezenvolve Nasaun nian hodi bele elimina problema kiak, dezempregu, malnutrisaun, dezigualdade no injustisa sosiál no ekonomia sira ne'ebé ami nia sosiedade sei hasoru.

Vizita Sua Santidade nian ida ne'e akontese iha momentu ne'ebé diferente tebes ho momentu ne'ebé povu Timor simu vizita husi Sua Santidade Papa São João Paulo II iha tinan 1989. Iha momentu ne'ebé Povu Timor-Leste enfrenta situaun kruél no desumanu oin-oin husi Militár Indonézia. Amo Papa nia vizita iha momentu ne'ebá ajuda tebes hodi mobiliza no loke comunidade Internasionál nia matan ba Timor-oan sira nia sofrimentu no luta ba Ukun Rasik-an.

Ohin, hetan vizita husi Sua Santidade Papa Francisco, laiha ona presaun husi Militár Indonézia tanba iha ona era Independénsia no Liberdade. Timor-Leste nian ukun rasik an, nudár rezultadu husi luta maka'as Povu Timor-Leste nian no kontribuisaun boot comunidade Internasionál inklui uma kreda Katólíka nian. Ita bele celebra hamutuk durante vizita ida ne'e.

Nudár estadu independente, Timor-Leste iha progresu barak hafoin manán funu ho Indonézia, ami iha eleisaun jerál sira livre no demokrátiku, iha liberdade ba movimentu maske sei iha dezafiu balun, Timor-Leste iha rezerva finansiamentu balun ne'ebé konverte husi mina no gas hodi finansia ba maioria nesesidade Nasaun nian maske rekursu ne'e la barak no la sustentável.

Ami iha instituisaun estadu sira no órgaun soberania sira lejítimu ne'ebé atu asume papél halo polítika dezeña planeamentu Polítika Nasional hodi kontribui ba harii sosiedade ekitável no sustentável. Timor-Leste iha Movimentu Sosiedade Sivíl ne'ebé forte, kritiku, síviku no sai hanesan parseiru Estratéjiku ba Dezenvolvimentu Nasional no Progresu sira seluk tan.

Maske iha Progresu balun akontese durante tinan 25 dezde referendu iha 1999, maibé Timor-Leste kontinua enfrenta dezafiu barak ne' inklui problema estruturál, qualidade edukasaun

ne'ebé universal, bee, uma ba povu, nutrisaun, soberania ai han, Estrada rural no saúde públiku, maske iha esforsu balun husi autoridade no Povu atu hetan maibé seidauk konsege.

Ami apresia tebes ho Igreja nia asaun hodi hasoru abuzu ba feto no labarik sira, maske dala ruma bibi atan sira mós komete, no ami husu ba Sua Santidade Papa Francisco atu enkoraja lider sira no povu Timor-Leste atu foti medida sira ne'ebé efetivu liu hodi prevene abuzu seksuál no violénsia doméstika.

Timor-Leste parte husi planeta terra ida ne'e, Planeta ne'ebé Sua Santidade hatuur iha segundu ensíklika ne'ebé kontén mensajen atu **“kuidadu ba ita-nia uma komún”**. Nudár Nasaun ki'ik no falta iha kondisaun barak, vulneravel tebes ba impaktu ambientál. Iha fulan Abril 2021 rezulta estragu barak no hamate sidadaun balun, estraga infraestrutura no povu nian riku soin barak, ida ne'e akontese nudár ezemplu husi impaktu alterasaun klimátika. Ami enkoraja atu Sua Santidade kontinua apelu no reza ba Mundu no Timor-Leste atu esforsu sira comunidade Internasionál bele iha susesu, bele redús emisaun ba atmosfera, restaura ambiente husi destroisaun no asegura mundu ne'ebé seguru no hakmatek.

FONGTIL konsiente katak destroisaun hirak ne'e, mai husi hahalok Nasaun boot no ema riku sira nian atu maximiza benefísiu ekonómiku ba sira. FONGTIL enkoraja atu Sua Santidade kontinua oferese kontribuisaun efetivu hodi bele kontribui desizaun global ba krize klimátika.

FONGTIL mós apresia ba Sua Santidade Papa Francisco nia apelu sira kona-ba diálogu no terminasaun ba konflitu no Krize iha Palestina no rai sira ne'ebé kontinua seidauk iha pás no hakmatek. FONGTIL mós sujere atu labele haluha Povu Sahara Osidentál, Papua Osidentál (West Papua) ne'ebé kontinua buka justisa no direitos umanus, liu - liu auto determinasaun. Papa nian vizita iha rejiaun ida ne'e, bele bolu atensaun ba comunidade Internasionál ba rai sira ne'ebé hetan okupasaun no dominasaun husi rai seluk.

Mak ne'e de'it karta Aberta husi FONGTIL ba Sua Santidade Papa Francisco nia vizita, ami hein katak karta ne'e sei too iha Sua Santidade nia futar oin. La haluha hato'o ami nia Obrigadu Wain.

Ami nia Respeitu



Valentim da Costa Pinto
Diretór Ezekutivu FONGTIL



Inocencio de Jesus Xavier
Prezidente Konsellu Fiskál